

- Home / Home /
- Molimo azali na posa, kasi nzoto ezali na bolembu

Molimo azali na posa, kasi nzoto ezali na bolembu

Matai 26:39 (Mokanda na Bomoi)

“Bongo Yesu akendeki mwa mosika, agumbamaki kino elongi na ye ekómaki pene na mabele mpe abondelaki: ‘Tata na ngai, soki ekoki, tika ete kɔɔ oyo eleka ngai. Nzokande, esalema te ndenge ngai nalingi, kasi ndenge Yo olingi.’

40 Azongaki epai ya bayekoli mpe akutaki bango balali. Alobaki na Petelo: ‘Bongo bokokaki te kokɛngela elongo na ngai ata ngonga moko?’

41 ‘Bókɛngela mpe bóbondela mpo bókɔta te na komekama; molimo azali na posa, kasi nzoto ezali na bolembu.’”

Maloba oyo: “Molimo azali na posa, kasi nzoto ezali na bolembu” elingi

koloba ete tango tolingi kosala likambo ya Nzambe, molimo na biso endimaka mpe elingi kosala yango, kasi nzoto na biso ezalaka na makasi te mpo na kolanda yango.

Na lisolo oyo, tomoni ete sima ya Mokonzi Yesu kotambola mokolo mobimba elongo na bayekoli na Ye kosala mosala ya Nzambe, na mpokwa bazwaki te ntango ya kopema. Bakendeki mbala moko na ndako moko oyo babongisaki mpo báfanda. Kuna, Yesu akobaki koloba na bango makambo mingi mpe kopesa bango malako ya suka, mpo ezalaki butu ya suka liboso akabwana na bango.

Bafandaki ntango molai, bazalaki koyemba, koyoka malako, kozwa makasi ya molimo, mpe kaka na butu wana Yesu asukolaki bango makolo mpo na kopesa bango ndakisa ya komikitisa. Lisusu basanganaki na mesa ya Nkolo. Yango wana, balalaki malembe mingi — ekoki kozala koleka bangonga mwambe ya butu liboso bápema.

Ezali polele ete balembaki mingi. Kasi ata bongo, Yesu alobaki ete bákengela mpe bábondela elongo na Ye, bálala te.

Kanisa naino: mokolo mobimba ozali kotambola, na butu mpe olali malembe, kasi na esika opema, bakobenga yo obondela. Na bomoto ezali mpasi, kasi Nkolo ayebaki ete ekoki kosalema. Yango wana alobaki:

molimo azali na posa, kasi nzoto ezali na bolembu.

Yango ezali etumba kati na molimo mpe nzoto. Soki tokoki kolonga nzoto, tokokola mingi na makambo ya molimo.

Ndenge nini tokoki kolonga nzoto?

Ya liboso, esengeli toyeba ete kozala na nzoto ezali lisumu te. Nzambe akelaki nzoto mpe bamposa na yango na likanisi ya mabe te. Akelaki yango mpo tózala na esengo mpe kimia awa na mokili.

Ndakisa:

- Nzambe apesaki biso pongi mpo nzoto epema.
- Soki pongi ezalaki te, tokolemba mingi.
- Nzambe apesaki biso posa ya kolia mpo nzoto ezwa makasi. Kolia ezali kaka mpo na esengo te, kasi mpo na kolendisa nzoto.

Lisusu Nzambe apesaki bato bamposa ndenge na ndenge: kosangana, koseka, kosepela elongo — nyonso mpo bomoi ezala na elengi.

Kasi sima ya lisumu ya Adama mpe Eva

Tango Adama na Eva batombokelaki Nzambe, masumu ekotaki na mokili. Banda wana, nyonso oyo ezali na mokili ezali lisusu malamumu te mpo na kolanda.

Adama apesaki Satana bokonzi ya mokili oyo, mpe Satana akomisaki makambo mingi oyo ebebisaka bato. Yango wana Biblia elobi ete tólinga mokili te, mpo mokili ebebi.

Tokolonga nzoto ndenge nini?

Tokoki kolonga nzoto te na kokangela yango to kokimela bamposa nyonso, mpo Nzambe nde akelaki bamposa yango.

Okoki te koboya nzala.

Okoki te koboya pongi.

Okoki te kopekisa nzoto eyoka eloko nyonso.

Nzela moko kaka ezali: kokima biloko oyo ebimisaka komekama.

Ndakisa:

- Soki olingi kozanga posa ya kolia mingi — kima esika ya bilei.
- Soki olingi kolonga bamposa ya nzoto — kima porno, baninga ya mokili, miziki ya mokili

mpe boyokani ya bolingo liboso ya libala.

Moto akoki koloba: “Bondela mpo nalonga bamposa.”

Kasi solo ezali ete: solution ezali koboya biloko oyo ebimisaka bamposa.

Likambo ya pongi na mabondeli

Soki olingi kolonga pongi:

- kima mbeto,
- sala likambo,
- tyá makanisi na yo na eloko ozali kosala.

Yesu alobaki te ete bayekoli bákangela molimo ya pongi. Alobaki: bótéléma mpe bóbondela.

Yango elakisi ete ezalaki demon te — ezalaki kaka likambo ya kopona.

Bato mingi balobaka:

“Na losambo nalalaka, kasi tango nazali kotala film nalalaka te.”

Yango ezali demon te. Pongi eyaka tango ozali kosala eloko oyo ezali kopesa yo motema te.

Soki oyebi ntina ya mabondeli, okolala te.

Bato oyo balalaka te na losambo bazali na eloko ya kokamwa te — bayebi kaka motuya ya likambo oyo ezali kosalema.

Maloba ya suka

Biblia elobi: molimo azali na posa, kasi nzoto ezali na bolembo. Molimo na biso elingi kosala mokano ya Nzambe, kasi esengeli tólonga nzoto na:

- kobondela,
- kotanga Liloba ya Nzambe,
- kokima komekama,
- kobondela esika mosika na mbeto,
- kobondela elongo na basusu mpo na kolendisana.

Kanisa malamumu: mokili oyo ezali lisusu ndenge Nzambe alingaki te. Satana azali na bokonzi na yango, mpe misala ya nzoto esukaka na libebi.

Biblia elobi:

Bagalatia 5:16-21 (Mokanda na Bomoi)

16 *“Nazali koloba: bókamba bomoi na bino na Molimo, mpe bokokokisa te bamposa ya nzoto.*

17 *Pamba te nzoto etemelaka Molimo, mpe Molimo atemelaka nzoto; nyonso mibale ezali kobunda moko na mosusu.*

18 *Kasi soki Molimo azali kokamba bino, bozali lisusu te na se ya mibeko.*

19 *Misala ya nzoto eyebani polele: kindumba, mbindo, kindoki ya nzoto,*

20 *kosambela bikeko, kindoki, koyinana, koswana, zuwa, nkanda, bokabwani, mateya ya lokuta,*

21 *zuwa, kolangwa masanga, kolia koleka ndelo mpe makambo mosusu ya ndenge wana. Nazali kokebisa bino: bato basalaka makambo wana bakozwa te Bokonzi ya Nzambe.”*

Nkolo apambola yo mingi. ☐

Share on:
WhatsApp